

四庫全書

史部

欽定四庫全書

續資治通鑑長編卷二百五十四

宋 李燾 撰

神宗

熙寧七年六月丁卯朔命知熙州王韶都提舉熙河路  
買馬權提點刑獄鄭民憲同提舉以中書言熙河出馬  
最多雖已置買務於熙州立法未盡故也

二十五日  
韶云云

詔賜提舉河北常平倉司衛州封樁糧四萬九千餘石

貸共城獲嘉汲三縣中等闕倉戶判大名府文彥博言  
懷衛州闕食饑民聚而為盜初無結集黨與臨時倡率  
即又潰散既無主名追捕止撓平民不安田種欲的有  
倡首姓名情理深重者乃追捕從之 詔河北路轉運  
提舉司置場以常平及省倉歲計餘糧減直許民以絲  
綿綾絹增價博買為轉運司年計或俟秋成博糴

庚午中書奏事已上論古人用兵奇正之術以謂旗參  
差而不齊鼓大小而不應此真敗也至如韓信之破趙

背水為陣而棄大將旗鼓以誘敵彼成安君知兵者也  
非示以真敗何能勝乎 河北東路察訪司魯孝寬乞  
自本司差官同安撫轉運司相度滄州三塘及緣界河  
經黃河填淤地募人種木從之 檢正中書戶房公事  
張諤言准朝旨權提點諸路監司所申巡歷狀乞監司  
官歲分州縣互巡次年正月十五日以前具已巡歷上  
中書經一年不巡者委中書點檢官申舉從之

辛未詔應赴後殿起居臣僚乞假如月過兩次令內侍

省遣醫看驗著作佐郎黃顏言給納青苗錢穀乞明立條約使州縣官吏視年之豐荒合請數給散毋以元散數為額權潤州觀察推官王覲言青苗錢乞自今災傷五分以土當展料者舊欠展料錢穀皆未得催理詔並送司農寺

癸酉遣官謝雨 河東都轉運使太常少卿集賢殿修撰張景憲為右諫議大夫再任先是諸路官吏行新法或違失監司多所奏劾人情惴恐景憲不劾一人議者

欲分河東為兩路事下景憲景憲言河東地肥磽相雜  
州縣貧富亦異正宜有無相通以備邊費若路分則財  
賦難以移用其議遂罷上批河北路已編排義勇保甲  
可速令具丁數以聞 詔真揚楚州運河依兩浙運河  
擇尤淺澁處先開淘令發運轉運司借上供錢雇夫  
甲戌權知開封府孫永言昭化軍節度使康國公承顯  
多以金錢與僧本立請求遷官乞從別差官推治詔開  
封府依公結絕如事干承顯即牒太宗正司會問本立

嘗屬宰臣王安石子雱永屢上殿及此上察永意欲以

及安石也

宋本削本立嘗屬王雱以下今復存之

是日中書奏事已上

語輔臣曰諸葛亮居草廬蓋有以自重然後可至大用

耳其二十罰以上皆自行之蜀寡材能之士是以每事

躬親亦何可譏也又曰韓信為大將勸漢王定三秦安

天下莫不如其策雖有成臯宛葉之危殆然天下大計

固已素定矣詔賜涇原路經畧司度僧牒五百以備

賑救又詔自今應陝西賣鹽場見在鹽約支及二年

即權停買納

乙亥詔罷道士威儀迎引宗室喪葬 詔監安上門光  
州司法叅軍鄭俠勒停編管汀州始俠上書獻流民圖  
朝廷以為狂策而不問第令開封府劾其擅發馮遞入  
奏之罪而俠又上書言天旱由王安石所致若罷安石  
天必雨安石既罷呂惠卿執政俠又言安石作新法為  
民害惠卿朋黨姦邪壅蔽聰明獨馮京立異敢與安石  
校請黜惠卿用京為相且言京及元絳孫永王介四人



者皆仁義人也惠卿大怒遂白之上重責之

佚言行錄云呂惠卿

叅政其日京師大風霾黃土翳席逾寸佚又上疏論之不報此事當考佚薦京為相比據京本傳新舊史皆云而實錄墨本但云佚稱京及元絳孫永王介四人皆仁義人不云薦京為相蓋不詳也朱本又削去四人姓名按熙寧編敕擅發馬遞罪止杖一百今勒停編管蓋別有所為而墨本朱本並云坐上書獻圖擅發馬遞此亦不詳也蓋當時但借此以責佚耳今并取新舊傳及司馬光記聞刪修四月七日佚初被劾八年正月七日庚子佚再竄英州

權發遣秦鳳等路轉運判官劉宗傑言階州

舊隸秦州今在岷州之南若割隸熙河軍馬易相照應

詔王韶相度以聞卒不行 皇城使王君萬為東上閤

門使達州團練使夏元幾為東上閤門使果州刺史西  
上閤門使苗授為四方館使榮州刺史如京副使狄詠  
為皇城使依舊兼閤門通事舍人餘遷官差賞以兵渡  
洮討殺蕃部通道之功也上因論及熙河功賞曰慶厯  
中西方用兵劉平葛懷敏失律士卒死傷數萬方贈官  
超絕推恩子孫至及二十人者士卒用命被重傷才得  
錢二千何其薄也今之燕設伶人吹笛擊鼓所得有過  
此者古人謂廩餼稱事正欲與事功相稱耳今熙河之

賞可謂優厚然激勵士氣人人惟恐不得當敵正用此耳

丁丑河北緣邊安撫司上制置緣邊後陂塘築隄道條式圖請付邊郡屯田司又言於緣邊軍城植柳蒔麻以備邊用皆從之 熙河路經畧使王韶言熙河二州最

為聚兵之地歲支人糧馬豆三十二萬斛草八十萬束本路有市易於茶鹽酒稅可以應辦宜糴乞差官二人乘賤計置其草豆別乞差四人專領並立數辦賞格并

乞鹽鈔三二十萬候三年外本司自辦從之 上謂輔  
臣曰近遣小使至畿縣視秋稼非常滋茂已有高及二  
尺者今秋若獲豐稔吾民其小蘇息乎 詔在京饑民  
令開封府籍大小口數并鄉土以聞開封籍上九百三  
十六人詔委官審問給券遣還本鄉 詔諸州軍職事  
申稟所屬修造城櫓軍器申經畧司軍政訓練都總管  
或鈐轄司合用物料轉運司外更不稟監司其事不由  
逐司亦不供報經畧等司不提振及措置不當監司具

奏

戊寅賜討蕩泚州將士特支錢有差 詔在京轉運諸  
軍都虞候以下至都指揮使應以戰功遷資願回授子  
孫者聽比歲軍校以戰功遷者往往超至右職故令稍  
推及子孫 又詔應按察官體量大小使臣老疾謬懦  
不職之類不經核實衝替差替者候到三班院引赴樞  
密院覆驗其堪瘡務者與合入差遣體量不當官司取  
旨

己卯詔在京一司一路一州一縣敕編修訖並上中書  
在京一司敕送檢正官餘送詳定一司敕令所再詳定  
宰臣韓絳言前內殿崇班王用臣敢死之士實有戰  
功今熙河路頗藉才武之人欲望與近下班行詔補三  
班借職熙河路經畧司指使初用臣任鎮戎軍定州寨  
都監坐自盜賊三十七疋法應絞免死配下班殿侍送  
本路効用至是又命之

辛巳新知蔡州兵部員外郎李復圭復為工部郎中直

龍圖閣知滄州復圭自曹州以親嫌徙蔡州過闕得對而有是命 兩浙路提點刑獄中丞盧秉為太常博士

升一任秉提舉鹽事歲課增羨也時秉已徙淮南東路

矣

五年二月十八日為浙憲七年五月十九日改淮東八年五月二十六日又升任轉官此年五月十九日

丙辰可考方勺泊宅編云云已見五年二月十八日

上批聞夏國旱菑擁羊馬

牧於緣邊河令六路經畧軍馬司嚴戒當職官吏常禁

察漢蕃戶無致侵竊

壬午分命輔臣祈雨

錄瀘州進士鮮于之邵為郊社

齋郎以梓夔路察訪司上之邵所陳邊事及役法可采也 詔增諸路教授 又詔同知禮院宋充國候禮院及三年與省府差遣以判太常寺元絳言充國故相庠之子供職已二年職事有勞也 賜岷州新置寺名曰廣仁禪院仍給官田五頃歲度僧一人

癸未秦鳳等路轉運司請於鳳翔府斜谷置監鑄折五折十錢乞降御書字樣詔惟鑄折二錢 河北西路轉運司請應募役人本家應排保甲者與免身丁從之



甲申詔諸班直并皇城司親從官配隸諸州牢城本城  
年五十以下情理輕者班直改配龍騎親從官配壯勇  
令刑部立諸班直叙法先是衛士以小罪或連坐降配  
其居南方者病瘴癘多不還自恃才武窘於衣食或亡  
去為盜故收恤之 詔措置懿洽州蠻事勾當官有功

第一等京官減磨勘二年選人循一資餘減年注家便  
官從察訪章惇請也 蠲澧州澧陽等三縣官竹園歲  
鬻筍錢委有司詳定盜筍竹法令州縣護養以助軍器

從本路提點刑獄李平一請也

乙酉皇第五子生遣參知政事呂惠卿告于太廟

名

秦鳳等路提點刑獄鄭民憲言已定熙州漢蕃弓箭手  
疆界置堡均地借助就耕食上批河洮岷州弓箭手令  
民憲速行安撫轉運司及其耕時貸以錢糧庶幾速見  
功緒 上謂輔臣曰天下財用朝廷若少留意則所省  
不可勝計昨者撥併軍營令會計減軍員十將以下三  
千餘人除二節特支及儉從外一歲省錢四十五萬緡

米四十萬石紬絹二十萬匹布三萬端草三百萬束若

每事如此及諸路轉運使得人更令久任使之經畫財

其可勝用哉

治平四年閏三月二十三日熙寧元年十月末二年七月十九日十月十二日三年

三月末十一月二十三日六年十月二十一日皆併營事兵志附此語於熙寧二年後蘇軾論併營前非事序

也合依實錄

陝州言五月乙丑大雨水漂溺陝平陸二縣

詔被水災民給口食三月遞鋪兵級人給般移錢千

詔降宣紙式下杭州歲造五萬番自今公移常用紙長

短廣狹毋得與宣紙相亂

丁亥睦州軍事推官中書禮房習學公事葉適為光祿  
寺丞館閣校勘權檢正中書禮房公事適初補試國子  
監生王安石愛其所對策安石去位呂惠卿薦之得召  
對不稱旨上以安石故特有是命

葉適事據  
司馬記聞

賜摩正

姓趙名思忠為榮州團練使母壽安郡君郢城簡賜姓  
李封遂寧郡太夫人妻裕囉勤齊為安定郡君結日卜聚為  
仁和縣君又名其弟董古曰繼忠結幹延正曰濟忠轄  
烏察曰紹忠巴珍覺曰醇忠巴珍穆曰存忠又賜其二

子長巴爾丕勒鄂丹斡名曰懷義次噶斡名曰秉義並為右

侍禁首領結赤木鄂特凌古並為東頭供奉官

十二月四日思忠為

泰州鈐轄二十七日新鄂特凌古舊史趙思忠傳并熙寧十年六月附傳摩正賜姓名授榮州團練使母郭城簡為遂寧郡太夫人月給脂粉錢三十千妻包氏為咸寧郡君母弟及諸子皆超授官方引對思忠時上召包氏裕囉勒齊許以蕃服及二子皆上殿勞問又詔思忠包氏聞汝夫婦不相能今當和睦思忠不能奉詔乃詔思忠居熙州包氏裕囉勒齊居河州此與實錄畧不同今附見聽以蕃服入見在九月十六日

戊子知冀州王慶民言州有小漳河嚮為黃河北流所壅今河已東流乞發夫開浚詔外都水監丞司相度以

聞既而不行 詔寺監銓院主判官歲許舉本屬官一員充京官或職官縣令內選入三員以上許舉兩員六員以上舉三員初勾當三班院陳繹蔡確奏舉權主簿奉國軍節度推官周淑為京官詔送流內銓許收使自今在京主判處官屬准此因著為令

辛卯詔以司天監新製渾儀浮漏於翰林天文院安置太常丞集賢校理兼史館檢討同修起居注提舉司天監沈括為右正言賜銀絹各五十司天秋官正皇甫愈

等十人並減年陞資餘各賜銀絹有差初括上渾儀浮漏景表三議及渾儀製器朝廷用其說令改造法物厯書至是渾儀浮漏成故賞之

八年正月二十七日厯成

王韶言奉

詔募買蕃馬今黑城夷人頗以良馬至邊乞指揮買茶司速應副從之仍令李杞據見茶計步乘船運具已發

數以聞

六月一日委船及鄭氏憲提舉買馬

贈衛國夫人沈氏為吳國

夫人沈氏太宗時入宮逮事真宗於藩邸上批可贈一

大國故有是命

壬辰知成都府資政殿大學士趙抃知越州從所乞也  
秦鳳等路都轉運使龍圖閣直學士蔡延慶知成都  
府同判司農寺刑部員外郎集賢殿修撰熊本為秦  
鳳等路都轉運使中書言陝西緣邊熙寧六年入納  
錢五百二十三萬餘緡給鹽鈔九十萬二千七百一十  
六席而民間實用四十二萬八千六百一席餘皆虛鈔  
雖有條約須納錢方給鈔以錢市糧草緣官中闕錢監  
糴之官務辦年計不免止以鈔折兌糧草雖有臣僚上



言乞復行交子多云每年出錢可百萬緡此不知行交子之意今若於陝西用交子止當據官所有見錢之數印造假如於邊上入中萬緡却願於某州軍納換即須某州軍納換處有錢萬緡畫時應副支給如此則交子與錢行用無異即可採緩急及免多出鹽鈔虛擡邊糴之弊詔永興路皮公弼秦鳳路熊本並兼提舉推行本路交子仍以知邠州朱廸提舉永興秦鳳兩路推行交子

子

九月十八日二十一日二十六日并熙寧四年正月二十四日四月八日可考食貨志第六卷中書言陝

西緣邊鹽鈔大出多虛鈔而鹽益輕以鈔折兌糧草有  
虛撻邊糴之患請行用交子法於陝西七年六月二十  
六日詔以皮公弼熊本分領其事又詔  
知同州趙瞻制置七年九月二十一日

癸巳錄進士李參魯為郊社齋郎參魯故海門縣主簿  
太學說書觀之子知制誥許將鄧潤甫言觀早以文學  
知名治古文通經術四方從學者常數百人參知政事  
范仲淹論薦嘗授一官赴太學說書子孫零落無綴仕  
籍者今以其文十七卷進呈乞依王回例官其一子故  
特錄之 梓夔路察訪熊本言夔峽州郡民間無井飲

夔州城中引三洞三臂兩溪水分布之衢巷貯以桐船  
木檻年必一易使汲者輸錢以治之欲以免役頭子剩  
錢給其費免取於汲者從之 上謂輔臣曰知州轉運  
使令久任呂惠卿曰衆議皆以舉縣令為急不知列官  
分職何處不擇人上曰刺史縣令治民為最近故以擇  
人為急若縣令中明有績効朝廷擢三兩人以勵庶官  
不亦善乎馮京曰漢宣帝以縣令高第者為刺史刺史  
有殊績者入為三公黃霸是也惠卿曰守郡輔臣體自

不同上曰如此用人恐亦非宜此霸之風采所以不及  
為郡時也輔弼之材如周之十亂乃為稱職耳韓絳等  
曰臣等過蒙拔擢實不足以仰望清光若如陛下所論  
臣等雖罄竭駑鈍不可一日在中書然不敢不勉耳上  
曰如卿輩知識高遠但行其所知古人不難到也惠卿  
又言太常寺朝廷禮法之司員數太冗賢愚雜處望選  
擇三兩人專領其職上曰誠是也唯祀與戎國之大事  
朝廷近年祠事極不如禮且湯伐桀武王伐紂皆責以

犧牲玉幣此固不可不重也 詔廣南路經畧安撫轉

運司據元管槍手土丁戶依義勇例東路槍手西路土

丁並每三丁差一丁其自來無槍手土丁州軍更不置

以本路轉運司申明舊制槍手土丁止稱主戶有三丁

者籍其一即未知六丁九丁者合與不合增取及自來

無槍手土丁處許與不許差點故有是命

會要太詳今從實錄存其

畧本志尤畧

知桂州劉彞言舊制宜融桂邕欽五郡土丁

成丁以上者皆籍之既接蠻徼自懼寇掠守禦應援不

待驅策而近制主戶自第四等以上三丁取一以為土  
丁而旁塞多非四等以上者若仍三丁籍一則將減舊  
丁十之七餘三分以為保丁保丁多處內地又俟其益  
習武事則當蠲土丁之籍恐邊備有闕請如舊制便奏

可

此據本志熙寧七年事  
今附六月二十七日

甲午上論結隊法因歎用兵之難以謂今之邊臣曉知  
奇正之體者已是無人況奇正之變乎且天地五行之  
數不過五故五陣之變出於自然非彊為之耳韓絳曰

臣昔嘗謂置講說之官今欲令諸路帥臣各具戰陣之法來上取其所長立以為法上可之乃詔五路安撫使各具可用陣隊法及訪求知陣隊法者陳所見以聞

乃詔

七月二十今并此本志係此事於五年誤矣若五年則韓絳不在相位

詔熙河路蕃戶

近已嚮順事多就緒其本路財利出入凡折博鹽酒茶礬稅市易坑冶材木酒坊鑄錢交子鹽鈔等委熊本經制務節用生財邊備豐行裁省冗官並與王韶相度施行

乙未命參知政事呂惠卿提舉編修司農條例 審刑  
院詳議官賈士彥乞差官以熙寧以來得旨改例為斷  
或自定奪或因比附辨定結斷公案堪為典刑者編為  
例又乞委官以諸州奏獄格式及敕律令文斷獄之事  
裁損編載立為案式頒之天下詔刑部編定

丙申遣勾當御藥院李舜舉往太原府代州勾當公事

此據  
御集

詔開封府界京東西河北河東陝西淮南兩浙

路轉運提點刑獄司具轄下闕雨處入急遞以聞

亦據  
御集



皆三十日事

是月廣州言鳳凰見增城縣西城縣民葛德

出私財修長樂堰引水灌溉鄉戶土田授金州司士參

軍賜度僧牒十

此據本志增

都水監言劉璿狀勘會北京

界黃河自熙寧二年閉斷北流後累橫決於許家港及  
清水鎮下入蒲泊水勢散漫渰浸民田六年十月王令  
圖等建議乞於北京第四第五埽等處開修直河使大  
河復還二股故道璿等尋被旨相度還言其利即已施  
行命范子淵等領其事子淵等開直河計深八尺不住

疏濬入閉斷南岸魚肋河四道捫撈水勢全入二股河  
今直河水深二丈五尺或增至三丈而許家港清水鎮  
河極淺漫幾乎不流看詳二股河今雖水勢深快成河  
道蓋緣蒲泊以東連接清水鎮許家港向下直至四界  
首漸次退出田土別無固護若向去却遇漫水出崖未  
免依前牽廻河頭復成水患乞下外監丞司相度候霜  
降水落將清水鎮河閉斷築縷河堤一道遮欄漲水使  
大河復循故道別無走移壅遏之患及退出民田數萬

頃民得耕種兼退背下博州界堂邑等七埽減省逐年  
修護之費公私俱濟監司勘會北京界第五埽所開直  
河及用濬川杷鐵龍爪䟽濬河道并閉塞魚肋河等元  
係劉璫相度措置今又以為言乞差璫與王令圖同外  
都水監丞司就計其事從之

會要以此事繫之七年六月今附月末其閉塞魚肋

河已見二月五日子淵等受賞在此年十二月十一日甲戌又六年十一月八日丁未可考

七月戊戌詔以十一月己未有事於南郊

己亥真定府路安撫司乞降度僧牒二百修城及發諸

縣夫五千以二年浚壕從之

辛丑詔開封府界民納蠶食鹽等錢折納糧者上三等如故餘並許納錢願輸本色者亦聽 又詔陝西解鹽司驅磨同管勾制置解鹽司楊蟠到任後錢數所入多寡以聞以蟠言二年之內比舊增錢七十餘萬緡而察訪李承之言其不職乞較歲課之登耗也

究竟如何

賜度

僧牒五百為杭州市易本錢又給二百賜河北西路轉運司市草 詔自今內外廂軍本城牢城及諸司庫務

院坊監等正副指揮使以上并自禁軍初補本城牢城等軍員依舊降宣餘劄下逐處給補牒三司乞借內藏絹二十萬以備冬衣從之詔自今舉官不當罪至停者取旨

壬寅命宰臣韓絳為南郊大禮使翰林學士元絳為禮儀使翰林侍讀學士陳繹為鹵簿使御史中丞鄧綰為儀仗使權知開封府孫永為橋道頓遞使後永罷以韓縝代之光祿寺丞韓宗古為館閣校勘宗古絳從子

也以王安石薦召對故命之

癸卯羣臣請加尊號曰紹天憲古文武詔不許自是五  
上表終弗許命工部員外郎集賢殿修撰判司農寺  
李承之太子中允直集賢院同判司農寺張諤秘書丞  
館閣校勘權判刑部朱明之太子中允權監察御史裏  
行丁執禮並兼詳定編修司農條例執禮仍充館閣校  
勘知開封府兵曹參軍大理評事吳安持忠正軍節度  
推官管勾國子監丞郭逢原吳縣尉提舉修撰經義所

檢討曾旼並兼充編修刪定官 上批陝西路亢旱秋  
種未入令轉運司訪名山靈祠祈雨 又詔五路教閱  
保甲州軍如闕令佐許本路權差守選或待闕人 又  
詔蠲河北西路五等戶免役錢一年仍自今東西路差  
春夫毋過五萬人河埽重役當增差者亦具以聞 又  
詔天下奏報雨雪賊盜之類舊悉以狀進令通進司分  
門類次畧為奏目進入 廣南西路轉運司言請攝官  
通十分為率長史文學七分進士二分特恩補攝者一

分候正額有闕以次差補從之

甲辰右正言直集賢院管勾國子監常秩為寶文閣待制判國子監秩疾久執政屢請進職以慰安之故有是命 詔熙河路破踏白城蕃部將官使臣比再收復河州功其倍賞之押隊使臣各計所部人數并獲級以十分為率九分以上為優等五分以上為第一等三分以上為第二等一分至不及分若無獲者並為第三等優等遷六官餘等降殺以兩至第三等遷一官仍減磨勘



一年於是先鋒東上閣門使達州團練使王君萬遷引  
進使皇城使文州刺史韓存寶帶御器械策先鋒六宅  
使林廣遷皇城使果州刺史左助陣右騏驎使盍可道  
右助陣左藏庫使郝進殿後姚兕策殿後姚麟並遷皇  
城使監照管中軍將引進使榮州刺史苗授遷忠州團  
練使總管燕達及君萬存寶授兕麟仍各官其親屬一  
人君萬等所獲並第三等特優擢之

監照管三字  
疑錯當考

乙巳詔宗室自賜名授官後十五以上理十年磨勘大

宗正司依審官院例檢舉其經覃恩改官者自覃恩後  
別理 河北東路轉運司檢定外都水監丞程昉新開  
永靜軍葫蘆河水入沙河利害以聞以民訴水淤漲乞  
候秋收隄防稍固決水故也

八年六月十九日  
九月七日可考

同糾

察在京刑獄祝誥請蠲天下負犯百姓見欠開封府贓  
賞錢賜河東轉運司錢十萬緡市糧草 詳定編修三

司令敕沈括言奉詔編修明堂籍田祫享恭謝式明堂  
祫享近歲多與南郊更用恭謝籍田歷年不講禮文蓋

已殘缺至於東封西祀朝陵等禮亦皆難以蒐究竊慮空文迄於無用欲止編明堂祫享二禮從之

戊申詔河北西路轉運副使吳審禮相度衛相州可置鐵監處以聞 賜度僧牒二千五百試監主簿齋郎州助教敕告補牒總五十賑貸涇原環慶路漢蕃饑民及為永興路常平糴本

己酉祠部員外郎集賢校理鮮于師中知河州

師中自是方知

河州朱史五月一日所書其誤審矣初命文臣知河州故記之

罷都官員外郎宋充

國同知禮院充國妻龐氏悍而妬充國以廟饗齋宿太常龐氏令二婢躡而從之充國答二婢送開封府即自劾既釋罪并罷其職事

壬子以美人邢氏為充容 延州乞發省倉白米三萬石糶與闕食人從之 上批河北修葺樓櫓守具及軍器合用物料可速相度差官往出產路剗刷計置或令市易務募商人結買 分命輔臣祈雨 中書奏自應天至淮以南有蝗已得旨差官監捕上批與免朝辭

癸丑手詔摩正己降熙河邊事漸就安帖此去惟當推  
廣恩惠懷輯羌落乃為經久保守之利如蕃部作過合  
行討蕩經畧司具事取旨 知諫院鄧潤甫言乞於每  
路監司擇一人與守令博訪青苗法度又乞每歲散青  
苗一料取二分息詔並送提舉編修司農寺條例司

朱本

刪去發貼云無  
施行今復存之

甲寅詔成都府路轉運等司體量轄下災傷州縣更不  
候披訴第與分數蠲秋稅 廣東轉運司言詔惠州永

通阜民二監歲鑄錢八十萬比又增鑄錢三十萬近有  
旨改鑄折二錢一歲比小錢可增二十萬欲乞以所募  
舟運至發運司改兌小錢入京以為軍國之計上批惠  
州阜民錢監治平四年置所鑄錢係內藏庫歲額止自  
前年移撥與轉運司買銅今既有羨餘宜復歸內藏庫  
四年三月十四日六年  
十月二十三日可考 詔差官權在京職任如大理

少卿之類知州以上資序即許奏薦 詔廣南東路提  
舉司劾廣州市易務勾當公事呂邈擅入市舶司拘攔

蕃商物以聞

朱史以事小刪  
去今復存之

乙卯檢正中書吏房公事太子中允俞充為集賢校理

權發遣淮南東路轉運副使 禮賓副使提點慈孝寺

任澤為西染院使以仙遊夫人母弟推恩也 司農寺

言蘇人訴沈括等所築民田岸圍侵壞良田橫費公私

錢未委虛實詔轉運副使張靚體視所訴事狀以聞

十月

體量  
到

詔廣州市泊可依舊存留更不併歸市易務

熊本言經制瀘州夷事除乞降外有水路諸村作過夷

皆已平蕩具賞平夷賊有功使臣為三等詔洛苑副使  
閣門通事舍人賈昌言遷西作坊副使餘轉官減磨勘  
年有差 司農寺言五等丁產簿舊憑書手及戶長供  
通隱漏不實檢用無據今熙寧編敕但刪去舊條不立  
新制即於造簿反無文可守尤為未便承前建議惟使  
民自供手實許人糾告之法最為詳密貧富無所隱誠  
造簿之良法詔送提舉編修司農寺條例司建議者前  
曲陽尉呂和卿惠卿弟也

八年十月二十三日罷手實  
呂惠卿誌呂和卿墓云君之



為曲陽尉會朝廷初行免役法他州縣皆莫能推行君  
首以曲陽戶等之高下役事之輕重第為數等以應令  
定帥李肅之深善之未及行以憂去服除復考太祖朝  
通檢籍并令文所謂手實者參之以周官大比之法成  
書以上欲以均天下之役錢會余以參知政事領司農  
寺事始推行焉宰相韓絳力請賞擢君而君意深不欲  
余為力辭於上乃不果賞其後異論參差事雖中寢而  
諸路州縣用以造簿者十已八九而役錢卒賴以均太  
祖朝通檢簿當考呂惠卿提舉編條例在六月乙未食  
貨志載和卿獻議今附七月末

丙辰詔諸房創立或刪改海行一司敕可並送法司及  
編敕所詳定訖方取旨頒行

戊午中書提舉五房公事主客郎中魏孝先知徐州年

四月二十二日召為司提舉百司此出必有為當為馮京也

上批已遣劉忱往河

東與北人議地界今韓縝方使敵慮於敵帳議論有涉

今商量事節宜令縝回至雄州先遣王宣齋一行語錄

赴闕

御集九十八卷八年七月五日問王宣元降赴闕指揮乃是沈括非韓縝然此時未差沈括也恐御

集或與此不同

上又批昨據王韶言本路荒田白草可與稗

草相伴飼馬聞洮西以累得雨野草茂盛民間以錢四

十市草三十斤比之官場價幾十倍其令制置糧草并

轉運司速定價督責吏收買以助邊食

二十四日可并此

詔

提舉永興軍路常平等事太常博士章淦體視環慶路  
災傷相度賑濟以聞

己未右武衛大將軍梅州刺史世恩襲封楚國公

世恩從式

第三子楚  
或作榮

詔荆湖北路轉運司相度沅錦黔江口三

處置博易場與蠻交易可否以聞後本司委知沅州謝  
麟相度麟言置務博買則均平物價招撫蠻獠新附之  
人日漸馴熟永息邊患又下其事三司時章惇領三司  
亦以為便從之 賜河北路弓弩十五萬令轉運司分

給諸州軍

庚申詔諸路方田令併稅物內稈草依舊輸本色

可并二十

二日

賜市易務息錢二十萬緡付定州封樁

又賜秦

鳳路都轉運司度僧牒二千試監主簿齋郎州助教敕  
牒三百變置糴本江寧府乞以衙前寬剩錢增給法  
司吏如因職事取受依轉運司吏法施行

辛酉檢正中書孔目房公事太子中允集賢校理許安  
世察訪荆湖路代俞充也岷州修城畢工賜諸軍特

支錢禁軍五百廂軍弓箭手蕃兵義勇三百改岷州緣  
邊安撫使司為洮東安撫司 樞密直學士知定州薛  
向言並邊教習卒伍試閱義勇保甲必為賞罰使之勸  
向今公使庫錢支費不足無以充賞而又募人伺察北  
邊機事其所募人不畏誅戮者以金帛誘之故也今苟  
無以給其欲則人莫敢赴欲乞給錢三萬餘緡回易以  
充其費詔以度僧牒三百賜之

癸亥分命輔臣祈雨於郊廟社稷 上批聞河北路有

蝗害稼而所在多以未至滋盛不即加意翦撲具次第以聞又批訪聞陳留等縣下戶已是闕食縣官又不許百姓披訴多行決罰人情惶擾極為可憂乃詔開封府界淮南路提點提舉司遍檢覆蝗旱災傷甚者具合賑卹事以聞賜米十五萬石賑給河北西路災傷 參知政事呂惠卿言司農條例所該事目極多欲下諸路令提舉司官各具本路推行新法有無疑慮須合申明及未盡未便事合更改措置或本路已修完改正可以推

之別路條具申本寺遍牒轄下官亦許直述所見

三月十七

日忠卿判司農已  
有此申請當參考

又言諸路州縣見行常平苗役丁

產保甲農田水利等事全藉簿書鈎考登耗虛實則其  
製造不可以無法欲令提舉司各據本路見有簿如何  
製造關防具簡徑式樣供申從之已而惠卿獻議曰免  
役出錢或未均出於簿法之不善按戶令手實者令人  
戶具其丁口田宅之實也嘉祐敕造簿委令佐責戶長  
三大戶錄人戶丁口稅產物力為五等且田野居民耆

戶長豈能盡知其貧富之詳既不令自供手實則無隱匿之責安肯自陳又無賞典孰肯糾決以此舊簿不可信用謂宜敝手實之意使人戶自占家業如有隱落即用隱寄產業賞告之法庶得其實手實法凡造五等簿預以式示民令民依式為狀納縣簿記第其價高下為五等乃定書所當輸錢示民兩月非用器田穀而輒隱落者許告有實三分以一充賞其法田宅有無蕃息各立等居錢五當蕃息之錢一通一縣民物產錢數以元



額役錢均定凡田產皆先定中價示民乃以民所占如

價計錢於是始行手實法

食貨志第二卷載參知政事呂惠卿獻此議中丞鄧綰駁

之按行手實法實錄不記是何年月但於此年七月十九日書司農寺云云亦不記建議者何人今既於七月十九日載和卿建議又於七月末因惠卿令諸路各供簿法即取本志所載惠卿云云附此志又云中丞鄧綰駁之天子是其議則於罷手實法時載之行手實法在七年十月十九日罷手實法在八年十月二十三日

詔五路州軍修城畢工令軍器監丞一員同本路監

司按視具有無未盡未便利害以聞是月開封府界

提點司言咸平縣有鸛鵒食蝗蝻

欽定四庫全書

續資治通鑑長編卷二百五十五

宋 李燾 撰

神宗

熙寧七年八月丙寅朔鄜延經畧使趙高言秋稼不登  
欲不候民訴放稅及自冬初日給闕食弓箭手常平米  
人一升半不足於省倉借給從之并詔近縣城寨秋田  
未成者亦優加賑濟 上批提舉市易司奏市易二年

收息錢九十六萬餘緡累準朝旨已支九十五萬緡可

契勘何月日指揮支往何處

訖無行遣朱吏削去以為支撥息錢不合書新本亦

削去今復存之此亦可見市易司為欺也

詔軍器監於諸路州軍除知縣

外許不拘常制選官計會轉運司剋刷州縣牛皮筋角

如能點檢失陷及擘畫拘收數多者等第酬獎

朱本有此新本

以為一時指揮削去

都提舉市易司言奉詔支息錢二十萬貫

付定州安撫司封樁欲充三司京東折斛錢差使臣運致以往詔知定州薛向如欲以京東錢就本處擘畫轉

物貨即依都提舉市易司所申奏

朱本有此新本以爲一時指揮刪去

丁卯詔瀛州以省倉糧三萬石博買絲綿疋帛 賜河

東轉運司絹十萬市糧草 前知合州比部郎中劉嶠

與堂除前知懷安軍駕部員外郎黃沐令轉運司劾罪

以梓州路察訪熊本言嶠議役法不爲暴橫所奪累有

申請皆可施行沐根括居民引簷錢以資公使故也

新本

從朱本刪去今存之

江淮發運司言淮南轉運司歲計已辦及

量減外少數尚十七萬七千餘石乞蠲減詔放七萬石

餘許次年補填 詔自今進奉蠶舊借役人馬者給遞馬如不足以免役錢差雇

戊辰詔募真定府邢洺磁相趙州關食流民修城壕真定府委守臣孫固餘委轉運判官李稷提舉仍半月一具已興修次第及支錢糧數以聞

己巳皇城副使兼閤門通事舍人知階州劉昌祚為西京作坊使走馬承受內供奉官徐禹臣為供備庫副使寄資賞討階州峯貼破隆博族蕃部之勞也昌祚先為

秦鳳路都監知甘谷城張詵將開邊遣侍禁王世文往  
階州峯貼硖集蕃酋犒設而誘說之衆疑曰是欲表裏  
熙河取我地爾即嘯聚大羅蘇木嘉族攻焚峯貼硖寨  
殺寨官軍民邊堠甚急詵憂懼不知所為即表乞昌祚  
知階州昌祚至遂討平之以功轉皇城副使於是進討

疊州改作坊使

此據張舜民誌墓昌祚有不許他路兵就熙州改刺奏請當檢附

詔

淮南東路災傷州軍巡檢縣尉令本路監司不拘常制  
奏舉候豐歲如舊又詔河北轉運使同外都水監丞

司相度減省河上冗占官吏以聞

朱本  
削去

知開封府兵

曹參軍兼刪定司農寺條例吳安持言昨同呂嘉問許  
定行戶條貫續差孫永體問利害供析事狀不無異同  
乞罷知兵曹參軍從之 崇政殿說書呂升卿言淮東

民所出役錢差重甚有願減錢應募之人尋召五十八  
人者專勾當諸場務嘗奏一路依此施行乞付轉運副  
使俞充相度仍兌糴發運司許糴上供米三十萬石與  
本路闕軍糧處令轉運司依價撥還從之

此可見升卿  
含講說而言

財利事也新本  
削去今存之

庚午右武衛大將軍仲綰領開州團練使仲瑄榮州團  
練使右監門衛大將軍仲真領文州刺史並以學士院  
召試中等也 光祿寺丞陳象古上書言所生母董氏  
嫁為孫氏婦迫於饑寒願許歸臣家詔開封府審問仍  
給以緡錢 詔知成都府蔡延慶兼提舉戎黎州買馬  
其合選舉官具名以聞 詔監司每半年一具有無措  
置改正事及保舉發摘屬官申中書考察如有可以施



行即下所司令遍關所屬從河北轉運判官呂溫卿請也  
詔蠲廬蘄等州民所欠熙寧五年秋六年夏免役錢州縣嘗於不當役之家例使均出者速改正除放

賜知鳳翔府光祿卿劉襲禮獎諭勅書襲禮須城人以應副熙河軍須九十萬有勞故也

襲禮傳元豐二年八月

辛未詔廊延環慶州保安軍民闕食者其夏稅已蠲減外更權倚閣

壬申詔河北非災傷州縣並排保甲監司其務勸誘習

四種武藝農隙閱試戶四等以下官給弓弩軍器監勦  
會相度以聞 罷諸路剗刷錢帛官先是上批問三司  
見差是何官在淮南剗刷錢帛中書言司門郎中王道  
恭太子中舍趙鼎詔罷之  
朱史削去今復存之  
上批據御集增入 秦鳳  
路轉運使熊本言夔戎二州舊無邊事守令惟用武人  
吏民病之乞自今並選文臣從之

癸酉詔前權京東路轉運判官太子中舍王子淵送審  
官東院差通判洋州坐擅於密州置市易務借官錢市

乳香也

蘇轍龍川畧志云熙寧中王子淵為京東轉運判官知密州海舶多私販乳香即明召舶客入

官中以賤價收之自以為奇言於朝廷中書戶房檢正官向宗儒得之喜曰此法所禁子淵為監司知人犯法不能禁而出錢買之此罪人也子淵既得罪香皆沒官一時以為奇策元祐初販香者訴之朝廷令戶部支還七分錢議者以

為過猶不及也

甲戌詔岷州將官皇城副使劉惟吉領英州刺史內藏庫使孫真並為皇城使隊將以下各第遷及減磨勘年賞計蕩岷州擾邊蕃部之功也 詔京西轉運司具賑濟流民事狀司農寺具所興修農田水利次第 大禮

使韓絳乞差檢正中書禮房公事向宗儒提點南郊事務從之其後每遇大禮從中書選差官兩員通管或只差一員

丙子詔久旱禱雨未應其令長吏躬禱嶽瀆聞涇原環慶廊延路自七月後得雨其闕麥種者官貸之官無麥種即借錢糴詔涇原環慶廊延永興秦鳳等路轉運司同帥臣議抽減緣邊軍馬從之內地或住營州軍以弓箭手代之陝西諸路闕食故也又詔聞鎮趙邢洛

磁相之民南涉者人數不少可令河北西路轉運常平

倉司疾速具見令賑濟次第以聞

此據御集

賜夔州路轉

運判官董鉞緋章服轉運使孫珪獎諭勅書銀絹二百

知施州寇平前卒賜其家銀絹半之餘減磨勘年有差

以熊本言鉞等招諭施州蠻田忠現等有勞也 樞密

院進呈入內供奉官保州廣信軍走馬承受公事任克

基奏體量得廣信軍推場北客算請行貨急速及皇城

使知廣信軍王臨殿中丞通判廣信軍路拯奏本軍擁

場北客近來入納行貨稀少算請行貨比舊日稍似緊急并據定州路都總管無安撫監牧使薛向奏體量得廣信軍推場見今北客買賣並依常例無比算得見今錢物却少如遞年別無急要大段結計還錢數詔王臨路拯任克基所陳與體量事實各有異同王臨路拯令河北西路轉運司任克基令開封府並勘罪以聞

此據時政

記八月九月  
事今增入

丁丑賜環慶安撫司度僧牒千以備賑濟漢番饑民也

兵部郎中集賢殿修撰張芻為遼主生辰使皇城使  
忠州刺史石鑑副之屯田郎中權管勾三司開拆使韓  
鐸為正旦使內殿崇政班王謹初副之知制誥章惇為  
遼國母生辰使引進使忠州團練使苗授副之衛尉少  
卿宋昌言為正旦使西京左藏庫副使郭若虛副之授  
辭疾改命引進使周永清永清又辭以母病改命東上  
閣門使李評既而惇為察訪命知制誥許將代之時敵  
以兵二十萬壓代州境遣使請地歲聘使多憚行將獨

欣然承命張芻請代州事詔答以不知將入對曰臣備侍從朝廷大議不容不知北人度臣不敢及代州事言稍相侵不有以折之則傷國體即詔詣樞密院閱文書遂為例及至敵館伴蕭禧果以代州事問將將屢屈之乃不敢言

此據將本傳增入更湏考詳

太常寺言大駕鹵簿五輅

之副各陳於後謹按周禮車僕凡師共革車各以其萃釋者謂諸萃各從其元則諸輅之副宜次正輅又革車本前代宮中所乘五牛旗蓋古之五時副車也以木牛



載旗用人與之失其本制二者謂宜省去並從之 詔  
編修勅令刪定官大理寺丞丁執禮升一任以編修歲  
計成書也

戊寅詔京西路安撫司流民依乞人法日給口食至九  
月止不足以常平米充 又詔成都府利州路轉運等  
司賑濟饑疫具次第以聞

己卯提舉編修司農寺條例司請新增縣丞主簿就充  
給納官從之 遣勾當御藥院李憲往相州賜韓琦詔

書湯藥

此據御集必有所為  
當考或無他則削之

庚辰檢正中書五房公事李承之言在京臣僚所請添  
支食錢等皆輕重不均及所給人從亦無定制以至吏  
祿多寡皆當著為通法詔承之與孔目房檢正官刪定  
辛巳詔開封府界所放秋稅及五分以上戶其去歲秋  
稅及佃牧地租並權倚閣上批真定府邢洺磁相趙  
州流民日過京師而磁州之數尤多雖屢詔當職官司  
賑濟都不見施行次第可令轉運等司速具折以聞

參知政事呂惠卿言常平錢糧並據願請成貫石給納日收息二分如願以糧銀絹絲綿紬布折納者聽元請糧納本色者每石息毋過二斗給納並約中價物少不盡其錢貼錢以納錢少不盡其物餘錢聽給其第三等以下戶免役錢願折納者準此從之

壬午命翰林學士兼侍讀學士元絳權三司使絳乞免赴講筵從之 權戶部副使太常少卿賈昌衡兼都提舉市易司大理評事編修司農寺條例則定官吳安持

為太子中允兼權發遣同提舉市易司翰林學士行起居舍人權三司使曾布落職以本官知饒州都提舉市易司國子博士呂嘉問知常州軍器監獄具布坐不覺察吏人教令行戶添歸詞理不應奏而奏公罪杖八十嘉問亦坐不覺察雜買務多納月息錢公罪杖六十而中書又言布所陳治平財賦有內藏庫錢九十六萬緡當於收數內除豁布乃於支數除之令御史臺推直官蹇周輔劾布所陳意欲明朝廷支費多於前日致財

用闕乏收入之數不足為出當奏事詐不實徒二年而有是命魏繼宗仍追一官勒停初市易之建布實同之既而揣上意疑市易有弊遂急治嘉問會呂惠卿與布有隙乘此擠布而議者亦不直布云周輔雙流人也

癸未翰林侍讀學士楊繪陳繹並為翰林學士已而知制誥兼知諫院鄧潤甫言嘗論陳繹過惡今繹除翰林臣適當制乞令以次當制官撰辭詔罷繹命先是潤甫嘗言鄧州卒陳美齊貴夜入州解與婢姦殺繹子及其

婦繹自見閨門狼籍一切寬貸庇覆鄧州所劾與轉運司奏不同乞遣官覆案故也 龍圖閣待制權御史中

丞鄧綰兼直學士院

綰代繹乃甲申日事今并書

殿中丞王圭為

監察御史裏行未幾圭卒詔賜其家錢百千以御史中

丞鄧綰乞加賜卹也

命知制誥直學士院章惇為河

北西路察訪使

正月二十七日曾布察訪西路惇必是代布此月二十日改命沈括

光

祿卿直昭文館知荆南潘夙知鄂州從其請也

從請據朱史當

考

知諫院鄧潤甫言近制試刑法者並許離任緣知

縣縣令所總事繁多及推行新法不可闕人自今知縣  
縣令不許赴試從之 詔知州通判如遇接送北使雖  
有服並暫許聽樂如知州武臣在父母服即許申安撫  
司權差官發遣 提點編修司農寺條例司呂惠卿言  
常平錢穀並於民闕乏時月作一料給散陸田多處以  
二月水田多處以三月為限隨秋稅起催限年終納足  
入十二月不納者依欠稅法如蠶麥豐熟許隨夏稅催  
納毋得過半限滿不足者勿給後料其依條倚閣者不

在此限從之 詔諸路監司訪名山靈祠委長吏祈雨  
又遣輔臣告於中太一宮 天章閣待制周孟陽卒詔  
官其女壻又例外官其一孫聞其家負官錢并息數千  
緡悉除之

甲申詔權發遣梓州路轉運使陳忱遷一官權發遣轉  
運判官呂開陞一任以應副瀘州夷事有勞也 閤門  
通事舍人狄詠為西上閤門副使王韶言詠戰洮西有  
功也 詔御史臺推直官職方員外郎田曾降一官京



西轉運使吳幾復轉運判官曾伉提舉常平等事胡宗師各罰銅十斤提點刑獄陳世修赴闕幾復等案權知唐州虞部郎中蘇涓失點檢兵馬司存留修召渠卒及妄費公使錢事涓不服訟久不決遣曾就州置獄涓又訴監司捃摭誣罔不實曾不并治廼令審刑院大理寺以涓等事狀取旨時既絀曾等涓所坐杖六十罪以赦

原

丙戌命知制誥沈括為河北西路察訪使代章惇也先

是遣內侍籍民車以備邊人未喻朝廷之意或相驚擾  
又市易司患西蜀井鹽不可禁欲盡填私井而運解鹽  
以足之二事言者牆進未省括時修起居注上顧括曰  
卿知籍車之事乎括對曰知之上曰卿以為何如括對  
曰未知車將何用上曰北人多馬常以此取勝非車不  
足以當之括曰審如此萬一敵寇至老稚墳墓田園室  
廬皆當棄之而身為兵掠復暇卹車乎今陛下籍而未  
取於民何傷上喜曰卿言是也何論者之紛紛也括對

曰車戰之利見於歷世巫臣教吳子以車戰遂霸中國  
李靖用偏廂鹿角以擒頡利臣但未知一事古人所謂  
輕車者兵車也五御折旋利於輕速今之民間輜車重  
大椎撲以牛挽之日不能三十里少蒙雨雪則跬步不  
進故世謂之太平車或可施於無事之日恐兵間不可  
用耳上復喜曰人無如此曉朕者當更思之卿又聞兩  
蜀禁鹽之利乎對曰亦粗知之上曰如何括對曰私井  
既容其撲賣則不得無私易一切填之而運解鹽使一

出於官售此亦省刑罰寵遺利之一端然忠萬戎瀘間  
夷界小井尤多不知敵鹽又何如止絕如此後夷界更  
須列堠加警則恐所得不補所費願勅計臣邊吏深較  
其得失之多寡然後為之明日二事俱寢執政喜謂括  
曰公有何術立談而罷此二事上甚多太平車之說括  
對曰聖主可以理奪不可以言爭若車可用敵鹽可禁  
括不敢以為非

括民車實錄不書去年十二月并今年  
二月十二日庚辰可考鹽禁則殊無所  
見括修注乃七年七月七日其知制誥不得其時  
實錄因括察訪河北遂書之今亦并附此兩事

寶

文閣待制常秩兼侍讀

十月十九日墨史又書此宋史削去新史因之蓋重出也

詔三司支粳米百萬石赴河北轉運司封樁

同判都

水監宋昌言李立之丞王令圖言汴口已生新灘秋冬

之交必稍退背乞權閉汴口使水涸增修隄岸斗門畢

再相度同判都水監侯叔獻丞劉增乞不開汴口於孔

固斗門下權作截河堰使水入斗門候修隄岸畢即開

堰詔如叔獻等所請

實錄八年閏四月三日當考又此年四月二十六日王統遷官又此

月二十九日張

琥言並合參照

詔別路士人在五路有教授州軍就

學者補試充上舍內舍生員毋過本路人三分之一  
詔開封府界提點司依諸路轉運司增置管勾文字官  
一員不許差出從蔡確請也

戊子遣將作監丞胡宗回點檢河北東路倉廩先往澶  
州北京計度見管廩屋可貯糧數具圖以聞

己丑詔諸路闕兵多處令監司選舉使臣招補開封府  
蔡確京東李察趙濟京西劉宗傑李南公並提舉招兵  
廊延趙高環慶楚建中涇原王廣淵秦鳳張詵提舉所

差將兵

九月十八日當考

河北西路轉運司請災傷路召募

闕食或流民興役朝廷賜米外其干農田水利及修城壕者悉給常平錢穀從之

庚寅詔司農寺遣官往西京賑濟流民及令河北轉運司曉諭存卹逐熟民戶無致流移巡察盜賊務令安居及令東路以所支粳米十五萬石內賜五萬石賑濟

詔臣僚嘗被誣枉停廢後辟訴復官者當得俸賜其非釐務及奉朝請日依分司官例給之詔河北旱災民

方艱食惟河防急切及修城許量調春夫餘並權罷一  
年從判都水監李立之請也 環慶安撫司言熟戶大  
旱闕食乞貸慶州糧七萬石環州三萬石從之

辛卯手詔河北已排義勇保甲集事之初全在得人專  
心經畫後乃可收其實用西路以知制誥沈括東路以  
龍圖閣待制曾孝寬提舉凡緣保甲職事官屬悉聽舉  
劾仍許不以時遣官或親按視檢察上欲擬後周八柱

國法故使從官領之不以屬帥府

此據沈括自誌括又  
云朝廷新伍民兵河



北河東陝西得勅卒百萬謂之保甲河北三十餘萬先集詔於從官中擇二人分領

詔淮南開

封府民被災傷者免差來年春夫河北西路轉運使體量邢洺等州災傷除放秋稅又詔河北上番京東武衛等兵士並宜抽歸營歇泊以省邊儲

壬辰河北東路兼青曹鄆濮齊淄等州察訪使魯孝寬言昨與曾布同詳定諸路教閱及賞罰格今布出外欲乞因今奉使更訪問舊格未便事與西路察訪使同詳定取旨詔沈括曾孝寬未進發間同編修訖奏又言本

路已排定保甲巡檢縣尉乞下所司選差其不任事者不拘常制選人代從之

癸巳詔河北東路轉運司災傷之民失於披訴者特於限外接狀檢放河北義勇保甲以災傷願往他州縣逐熟者以狀言於縣豐歲關牒所住州縣令復業其所過稅錢百以下並放遣官於南薰安上門置場給流民米人日二升幼者半之時流民自北來者幾三萬人故也詔引進使達州團練使王君萬等十四人遷官有差

君萬仍賜絹五百官其親屬一人例外加一資皇城使  
威州刺史康從領文州團練使官其一子內殿承制張  
之諫遷文思副使賞討蕩泚州之功也 右諫議大夫  
集賢學士宋敏求上編修閣門儀制十冊 簽書鎮寧  
軍判官孫亶言真定府邢洺磁相趙州流民經過澶州  
浮橋者日益多其上三等戶皆言懼為人攘奪勢不可  
居欲令此數州通判職官同令佐詣其鄉優加存卹如  
安存及千人以上量賜獎擢其第四等五等欠青苗本

息錢者乞展限納流民所棄田權召人佃依逃田法以  
年分漸輸納所欠青苗錢候歸集日施行從之其安存  
流民酬獎仍令立法以聞 知延州趙高言奉詔以緣  
邊旱災漢蕃闕食民將逃去委臣勞徠亟議安集之計  
近緣邊得雨而民間闕種漢蕃弓箭手願借官種者各  
給小麥一石及檢視諸寨城壕不及丈尺者和雇饑民  
興修邊民所採木及賣牛馬不售者以官錢買之漢蕃  
戶賣馬可備戰用者優給其直經畧司常平倉糧穀並

減價糴詔秦鳳熙河涇原環慶路經畧司詳高所奏倣此措置先具施行次第以聞永興軍路安撫司言乞展限一月收訴災傷狀河北東路提舉司請除放第五等中等以下役錢並從之

甲午侍御史知雜事張琥言侯叔獻乞不開汴口創築橫隄并置梢澁修舊斗門疏洩水勢還河萬一深冬冰塞斗門瀉水衝溢新堰大則都城可虞小則沿汴居民被害雖省一二十萬物料增置梢澁所費亦不以乞依

舊開塞汴口不報又言河北流民多往京西雖已差官賑卹乞多給度僧牒并空名官告召人入粟救濟詔司農寺所差官計會轉運司輟省倉穀賑濟如闕少即計所用空名補牒勅告度牒具數以聞 併辰州麻陽招

諭二縣隸沅州

實錄云併辰州麻陽縣入錦州寨隸沅州今從九域志志又云八年廢錦州寨

及招諭縣入麻陽地理志亦云八年併錦州寨人戶及廢招諭縣入麻陽為一縣事在八年二月末實錄又云省辰州招諭縣入沅州今並從九域志又實錄八年二月末并十二月云云已具注於彼



欽定四庫全書

續資治通鑑長編卷二百五十六

宋 李燾 撰

神宗

熙寧七年九月丙申朔遣官謝雨命守臣謝嶽瀆詔  
司農寺籍所興水利自今朝廷遣使即委以體訪其不  
實不當者案驗以聞用御史知雜事張琥請也 賜右  
班殿直同管勾修內司楊琰度牒三十永不磨勘琰本



杭州木工有巧思宋用臣所領營造琰必預其事故得  
出入禁中嘗命修感慈塔既成自言貸修塔官司錢九  
千餘貫以集事乞納出身宣劄求賜空名勅告以償之  
上令琰以支費歷赴中書及舊掌修塔庫供備庫副使  
黎承德保明所貸數以聞故賜之其後琰用營造勞遷

官未嘗止也

朱史載貼云楊琰何嘗出入禁中此言誣罔已未朝旨下遂官取會並無照據合刪

又刪琰後用營造遷官未嘗止却增上於用人雖微者  
必盡其所長賜予織悉各當其分不容僥倖如此新史

悉依舊本  
今從之

丁酉上謂輔臣曰昔湯至紂六百餘年民之戴商亦已  
久矣同力度德同德度義武王以革車三百兩虎賁三  
千人而破紂如林之衆其用兵行師非有法制不能至  
此馮京曰紂雖有衆七十萬然天下之民苦紂之虐政  
歸文武之仁德蓋在德不在衆也 詔知成都府自今

舉文臣知戎州 又詔河北西路轉運司體量真定府  
邢洺磁相趙州通判知縣如不能安輯人民復業並選  
所部官權代仍速賑濟內義勇保甲保丁正名更優以

貸給時上聞河北流民日過京師不絕雖已諭澶州等

處約回力及之人令遷入城郭安泊慮州縣不能曉諭

即轉徙未已故有是命

約回力及人戶見庚子日當在此丁酉日前

知桂

州劉彛乞募人耕曠土中書戶房言開封府界方召人

開種稻田及新置沅州有屯田之法與廣西事體相類

欲各錄其事付彛今更參詳立法以聞從之

四月十九日置沅州

所稱屯田法未見本志亦云章惇初築沅州亦為屯田務又元豐二年七月二十一日罷沅州屯田務

上批京師諸軍闕馬坊教閱可令熙河路買馬司如買

可配軍馬及三百匹即遣官部送

戊戌上以連日陰雨喜諭輔臣曰朕宮中令人掘地及一尺五寸土猶滋潤如此必可耕耨韓絳等言陛下憫憂元元禱祠備至精誠上達旋獲感通臣等比預太乙齋祠竊觀執事者踰旬未嘗解帶可見聖意虔恭左右之臣亦不敢少怠也又論及河北邊備欲料簡重兵於大名高陽真定等處顧不難但統御者未見其人昔曹公嘗料袁紹兵多適足為禽卿等當深思之知太原

府龍圖閣直學士起居舍人劉庠為禮部郎中再任庠  
尋以母喪去 荆湖北路轉運司言諸州軍及川峽四  
路鐵錢界罪人當配廣南者除情理凶惡州軍餘並配  
沅州候及五百人止詔沅州廂軍五百人內招本城三  
百人以宣節為額牢城二百人許剌配諸處罪人候足  
停配 詔河北京西淮南永興秦鳳等路轉運使比時  
雨屢降可督當職官勸民趨耕其災傷農民如因官私  
欠負及簿書有拘繫者並權放就農候布種畢施行

岷州言已立解額乞賜國子監書許建州學從之

已亥命岐王顥為南郊亞獻嘉王顥為終獻 環慶路

安撫使楚建中言奉手詔以緣邊旱災漢蕃闕食夏人  
乘此薦饑輒以賞物招誘熟戶至千百為羣相結背逃  
若不厚加拯接或致竄逸於邊防障捍非便委臣講求  
安輯救接之計臣自八月首戶支糧一斛五斗至二斛  
今又是九月戶計口借助錢三百至五百至來年四月  
計十二萬緡上批散糧又支錢所費既多當此災傷之

際極邊何以供辦其罷助錢非緣邊州軍仍募闕食戶  
運米往緣邊城寨比原糴價不虧官即出糴本司無見  
糧即計會轉運使允糴 詔瀛州修城已畢冀州方修

及深趙邢州委李稷恩濱州委陳知儉再檢計其餘令  
察訪司委官覆計度州縣界內外軍民如緩急入保合

修展具圖以聞

知儉時為河北  
東路轉運副使

庚子上與輔臣論河北守備韓絳等曰漢唐重兵皆在  
京師其邊戍裁足守備而已四方有警則兵從之出故

邊無橫費而強本弱末其勢亦順開元以後有事四夷  
權臣皆節制一方重臣悉在西北天寶之亂由京師空  
虛賊臣得以肆志也上曰邊有老人亦謂今之邊兵過  
於昔時其勢如倒裝浮圖朕亦每以此為念也

兵志繫  
此事於

熙寧初  
誤也

命太子中允館閣校勘崇政殿說書呂升卿

兼同修撰經義 上批在京及河北禁軍常患役不足  
府界及京東西淮南先遣戍諸路禁軍廂軍節次抽減  
歸營諸路近年已增置就糧禁軍并教閱廂軍具令經



略安撫鈴轄司常務揀選填補以足元額訓練精熟以充防拓 召輔臣觀稻於後苑上批近河北鎮趙邢洺磁相等流民過京師者甚有力及戶聞非因災傷乏食就穀止緣客戶多已逃移富者獨不敢安處田里不速禁止邊民流散於守禦之計極不便可令澶州等處體量如委是力及戶即計口給一去路糧約回本貫仍丁寧曉告用心安輯如在村野難以獨居處之人多方開諭暫遷就附近城郭安泊

丁酉日已云約回力及人戶不應後四日乃降指揮恐實

錄或失先後之次

辛丑詔真定府路出省倉糧十五萬石減價糶許民間用金銀等物博買戶毋過兩石 又詔開封府界河東災傷州軍許於限外接訴狀以聞遣比部員外郎王荀龍京東收糶詔京東轉運司剗刷上供錢帛並留為糶本

壬寅戶部侍郎致仕張掞卒

甲辰涇原路安撫使王廣淵言民飢流徙而倉儲將闕

計一月所支凡四萬七十石乞降度僧牒五百借封樁粟盡行賑濟上曰涇原雖災傷然不如廣淵所言之甚豈有不問貧富一例賑濟之乎遣太常博士劉定乘驛體量當賑濟事馳驛以聞十一月一日催定上批昨降指揮

在京諸行人歲輸免行錢特與除放一萬貫據孫永已

詳定到可速契勘施行

此據御集免行一萬貫至是乃除放也

丙午上與輔臣論戰陣之法因曰兵陰事也主殺尚右而陽多者勝如高者可以勝下長者可以勝短是也

詔詳定行戶利害所諸行應有不同者定歸一行供輸  
仍隸都提舉市易司 詔澶州具涉春以來南渡流民  
數以聞時澶邢等九州流民凡四萬六十餘人 內出  
攻守圖二十五部賜河北又出敵樓樣送軍器監頒降  
修製 河南監牧使呂希道請募民於沙苑牧羊詔皮  
公弼審問民願否并具利害以聞公弼請撥牧羊地十  
頃召人耕佃每畝納租錢百本監封椿餘十頃令沙苑  
監牧馬從之公弼又請募人於京畿入羊每斤為錢百

三十詔罷之

八年閏四月十九日公弼方有此請朱史既載於此又載於彼誤也今止就此載之

范祖禹誌希道墓云希道初以奏課對神宗諭以言者欲於沙苑牧羊計綱入京希道言此細務臣不敢煩天聽上曰有唐故事希道曰唐都雍去沙苑近今京師非雍北也條其利害凡貨緡錢數萬神宗釋然納之按此則希道乃不欲牧羊者與實錄異當考

丁未虞部郎中俞士龍職方員外郎鄭恕各遷一官除

知州以前監市易務課利增羨也 史館修撰宋敏求

等上蕃夷朝貢錄凡二十一卷即李評所請也 司農

寺言近祥符縣引見保甲有自陳乞試武藝者雖與推

恩然慮向去做做不已自今敢有自陳雖武藝合格亦隔一次從之 輔臣有言將帥宜置副貳者上曰人之忌能者衆令舉所知不過取其出已下者非有至誠惻怛之心為朝廷立事也呂惠卿曰詩以周爰諮詢每懷靡及古人以王事為心如此上曰聖人取諸人以為善人之言有可行當即行之何所問也馮京曰舜自耕稼陶漁至於為帝無非取於人者上曰用人之言亦難惟舜大聖故能如此耳朕每於庶事心既自了則所言是

非隨即辨白古人所以貴知言也 詔日者分兩浙為

東西路今有司言供億錢穀多在浙西計置及水利事

盡在蘇秀等州分之必至闕事其毋復分路

分路在四月二十六

日癸巳朱本削去墨本誤也其復分路在九年五月十一日丙寅

戊申詔係役廂禁軍自今權免役專隸習武藝 置鳳

翔府簡中保寧六指揮三千人專備熙河修城寨 賜

內藏庫錢十萬緡河北糧鈔二十萬石付西路轉運司

令商人入中 名南郊青城諸門前曰泰禋後曰拱極

東偏曰承和西偏曰迎禧正東曰祥曦正西曰景曜其  
複門東側曰寅明西側曰肅成殿門曰端成前東西曰  
左右嘉德便殿曰熙成苑門曰寶華前此青城殿宇門  
名皆臨時學士撰進至是命中書參定賜名永為定式  
河北西路察訪使沈括言近有旨令兩浙路轉運使  
等各提舉一州第二料水利轉運司奏稱有未便臣在  
本路與監司日夕聚議凡半年王庭老未嘗言有不便  
今有此異同乞行推究詔第二料水利除不可興修外



並先從低下處興工中高田不得一例圍裹仍令廷老

具析前後異同以聞 詔劉忱蕭士元會蕭素梁頴於

大黃平以呂大忠丁父憂不至也

三月二十五日忱等受命四月二十七日

大忠乞錄地界事付韓續此實錄所書大忠尋請假歸永興軍省父疾約徑路與劉忱會於太原忱六月七日起發大忠父尋卒既葬乃詔墨服往代州與忱密議其到代州蓋十月二十日此據大忠集 初素以

平章事欲正南面坐自云北朝使相有此廟坐儀餘乃

序官坐仍欲以墩分高下忱等皆不從移文詰難自七

月至於是月事聞乃得國信所言至和元年國信使蕭

德帶平章事與館接使行馬坐次皆分賓主以報素穎

乃不敢爭

舊文云遂以賓主相見今改云乃不爭  
密時政記十月五日云素與忱等文移往返

數十次事聞國信所勘會到肅德故事劉與忱等忱等  
牒素請只依九月六日所議坐次早約日相見素辭屈

乃依賓主禮相見九月六日所議蓋賓主相見  
禮也相見則在十月五日以後并十二月末

初詔

劉忱等與北人會議天池廟鴻和爾山麓土斷有明據可

以理譬喻之其餘地界如數議不諧可以南北堡鋪中

間為兩不耕地又不可則許以中間畫界其中間無空

地即以堡鋪外為界是月戊申也

即十三日

其後李舜舉言

近至遠探鋪遙望大黃平會議處盡見地形問防拓人云欲直以大黃平橫都谷為界蓋鋪屋使者在境又聲言再遣汎使自知理屈故作虛聲臣料敵情會議有必得之望不與相見止於循舊址增移鋪屋即是議與不議等若慮絕好起釁必不在此設欲屑就其議而與之不若聽敵人無名自占俟我兵儲有備明曲在彼而復之朝廷若以封疆為意特須主張如大石等五寨禁地並當理取仍舊以關口守把交蹤或且為羈縻之策乃

詔九月戊申指揮更不施行然其後竟盡與之

此年十一月二

日丙申二十八日壬戌明年二月十日壬申三月八日  
庚子十七日乙酉四月五日丙寅皆合參照實錄熙寧  
八年四月丙寅遣使蕭禧等辭初朝廷既遣劉忱蕭士  
元詣河東理辦疆界而契丹亦令蕭素梁穎會於境上  
忱以疾不即至又命呂大忠代士元素穎頗倔彊未肯  
見忱等一日蕃酋引兵萬衆入代州界焚鋪屋與官軍  
相射既而素穎徑入橫都谷施帳幕邀忱等相見忱等  
不往又欲設次於西陁東谷忱等以侵地愈深不許竟  
會於大黃平凡三四見議地界不能決初指蔚應朔三  
州分水嶺土隴為界忱等偕素穎行視無土隴乃但云  
以分水嶺為界蓋山皆有分水嶺槩言分水嶺為界則  
至時可以罔取此點敵之微意也與忱等相持久之復  
遣禧來蕃酋引萬衆入代州界焚鋪屋與官軍相射  
既而素穎徑入橫都谷施帳幕邀忱等相見忱等不往

又欲設次於西陲東谷忱等以侵地愈深不許竟會於  
大黃平此等俱合於七年九月載之不應於八年四月  
別出須考詳刪修 范育作薛向行狀載向密奏  
乞令劉忱緩行以老敵師上用向計敵食盡遂去

已酉檢正中書五房公事工部員外郎集賢殿修撰李  
承之為河東察訪使 賜河東提刑司紫衣度僧牒千  
計置錢糧分給管下闕倉州軍 熙河經略司言收復  
河洮州應副軍須官乞比第三等第四等酬獎詔減年  
磨勘堂除免試不拘名次差注凡二十二人 上批陝  
西五路經略司案視緣邊諸城堡寨廣為守具毋誤邊

計

庚戌借內藏庫錢百萬緡付河北轉運司封樁 又詔  
提舉秦鳳等路監牧原渭州鎮戎德順軍遇蕃部馬至  
即受之無輒遣人招誘

辛亥羣牧司言除樁管不係支使及牧養監病馬外自  
今以二千匹為額其餘堪配軍及雜支馬權與闕馬軍  
士 詔邢洺磁相趙州成德軍今年畸零夏稅權倚閣  
詔京東轉運司以上供折納斛錢納穀封樁水運赴

河北 詔趙思忠妻子聽以蕃服入見

六月二十一日可考

詔

提舉市易務賈昌衡等自今有公事許直牒閣門上殿

此據御集

壬子命東上閣門使滎州刺史李評權同勾當三班院

評自是始復入故特書之

司農寺言諸旌表門閭有勅書及前代

帝王子孫於法有蔭者所出役錢依官戶法賜號處士

非因技術授者準此從之 以秦州買馬務隸提舉熙

河路買馬司仍以秦州通判兼提舉牧養歲終計綱撥

發都提舉在京市易司言乞罷本司提舉官歲終比較推恩其監官自從舊賞格諸賣買博易並隨市估高下毋得定價其當給三司變轉物即依三司所估民願以抵保賒請折博歲出息二分計月理息者聽從之上以諸路旱災常平司未能賑濟諭輔臣曰天下常平倉若以一半散錢取息一半減價糴使二者如權衡相依不得偏重如此民必受賜今有司務行新法惟欲散錢至於常平舊規無人督責者大凡前世法度有不可行



者宜謹守之今不問利害如何一一變更豈近理耶

此墨

本所書朱本因之神宗聖慮即此可見二十六日上批當考

是日三司火自巳至

戌止焚屋千八十楹案牘等殆盡詔三司權於尚書省

蒞事

朱定國續歸田錄云熙寧中有人獻議酒務炊作連竈一門而三鑊一門用柴三鑊俱沸用柴既省

謂之燒省法以其法遍諭天下用之此法本巴蜀煎鹽之利水有溫熱遂取之其實沸止一鑊爾炊酒竟不可用而所在但傳燒省法及三司災屋千餘區一日而省之文案存者無幾始知燒省三司災之識爾豈偶然哉

連竈法據司馬光日記乃京東提刑王居卿所獻已附注四年十二月辛酉更須考詳

又詔權

御史中丞帶學士常參正衙起居並立中丞本班其雜

壓則從學士以直學士院鄧綰章惇互論班著故也

八年

正月壬子  
別著令

癸丑詔新知常州國子博士呂嘉問監市易務上界職  
方員外郎劉佐西頭供奉官吳真卿並遷一官勾當公  
事須城縣尉劉迥為奉禮郎各減磨勘三年餘官吏循  
資賜錢有差以三司驅磨市易上界課利比六年增十  
餘萬緡也 提舉永興秦鳳路交子宋迪制置永興秦  
鳳路交子

六月二十六日迪以知邠州提舉令  
改制置二十一日二十六日可考

詔三

班使臣遇同天節自供奉官至殿直許量率錢進銀及道場功德疏差使臣管勾齋筵以前此多率使臣俸錢以供浮費人頗苦之故也 詔河東秦鳳永興等路都

總管司見管軍馬別降指揮團併外其開封府界河北京東西路置三十七將副選嘗經戰陣大使臣專掌訓練河北四路為第一至十七府界為第十八至二十四京東為第二十五至三十三京西為第三十四至三十七從蔡挺請也敝議雲中地界久不決挺請盡召還河

北緣邊戍兵示以無事兼可積蓄邊儲因是更制將有  
正副皆給虎符又以河北兵教習不如法緩急不足用  
奏乞於陝西選兵官訓練六年六月十二日以京東武衛六十二指揮分差主兵官  
勾抽訓練案此時已有置將規模也八月二十四日可考

甲寅上謂輔臣曰卿等所上邊防畫一先擇可施行者  
十四事更與樞密院議之恐事有未盡既而二府合奏  
可行之事凡十有四其一自來出戰有功大小使臣未  
經升擢者以功狀次稍多或一次功狀優異及知名人

作一等餘作一等取旨升用考其才實二停閑使臣降  
配軍員年六十以下武藝及中等精神不衰令投狀自  
陳長吏試驗如堪戰陣保明以聞三令安撫轉運提點  
刑獄察訪司各體驗轄下將官人材智略具緩急任驅  
策與否內有才之人差遣近下可以升擢及緊要閑慢  
合對換文臣有勇略可為將官不拘路分並密以聞四  
近降度僧牒三百與定州安撫司充訓練義勇保甲及  
募刺事人之費其緣邊州軍宜並依定州例量賜本錢

出息令鈎致北人之能知其國事者或質所愛使探問敵中任事主兵人姓名材能性識所管兵數武藝強弱屯泊處所城壘大小糧食多少及出兵道路刺其的實逐旋以聞候到參互比較有實者編類成書準備照用其邊臣不能使人到前後探事尤無實者當移降五河陽別置水軍五七指揮造船習戰以備敵濟渡者六既為堅壁之計當有清野之法逐縣預以義勇保甲附保甲丁口數寓之籍中本州密約計人數至時分入州城

及大縣別為一籍令司農寺依樞密院先降造丁產簿條約一處編籍七北京城西偏帶沙低薄已檢計立限修築上下水關其護闕戰橋并左右引手城未高堅相度增築置樓櫓守具八衛州大河之南密接京畿正當控禦之地其城至小并黎陽城亦當要害未能包山為固並展拓修築緩急屯兵防越軼之患九分屯兵馬出戰要害之處並委察訪使就與逐路安撫使等處置具防守事以聞十相度展拓城壕及增築縣城緣城大人

寡及城小人衆於法皆在所不可守宜先計度本州戶口若干除保縣寨外若干人保州兵民除上城出戰外可容若干若更外人戶容之不盡即展拓毋令過大致難防守其當增築縣城等項須逐州軍更相照應緣四路帥府分統州軍其勢當如絡脉之相通緩急寇至即候望相及犄角相應堅壁出戰皆合事機而敵人腹背懷懼其勢自潰如此修築即不枉用工力十一如遇有警清野備敵百姓般糧斛薪芻畜產入保城壘并合



積畜守具及分擘部分倉猝之際常患措置無法即須計度官司屋宇及空閒地分配人戶居住及安置所般之物并內有人力不足官為募人般運寄納出給如此之類并應於守拒事件預為講畫詳古今法制斟酌事宜具條件以聞十二敵人出入道路宜悉知之先據地利安置營寨開掘坑塹示之以利導令必趨及可以設伏處預知地形高下水流所歸如壅決某水即可衝灌某處若恐敵人用之即就何處防守䟽決或回避並悉

講求畫圖以聞十三河北地利所出有限從京那移錢物多行糴買即增起物價而費本已多宜撥粳米百萬石封樁每年於汴綱內支撥應副仍令京東轉運司據合上供或酒場剩錢於有水路州軍糴粟米小豆計舟車步乘般往河北合分往逐處收蓄及於京西路沿蔡河州軍亦賜糴本錢計般運到京入汴但算糴本步乘比本路常平糴價不貴即計置寬緣邊糴買之數可減撲物價多蓄斛斗以紓邊計其京東西路合計買事專

委官相度施行詔皆行之十四河陽置水軍不行仍令

樞密院於登州增招刀魚戰船兵團結閱習準備差使

詔已選差教馬軍使臣所有合教事藝宜令曾孝寬

張誠一同郝質賈逵速詳定聞奏

此據御集七十三卷七年九月十九日手

札教馬軍事自此始實錄不書今追書之熙寧十年九月庚午以後至元豐六年二月戊申並合參考

詔置河東經畧司勾當公事官一員候邊事寧息減罷

從經畧使劉庠請也庠又乞給錢二十萬緡修緣邊近

裏城及軍器詔察訪司相度以聞檢正中書五房公

事李承之言三司帳案文字焚燒幾盡外方人吏因此  
拆兌隱藏案檢乞下諸路應熙寧五年後文帳案檢委  
州縣畫時監勒吏人檢取封印架閣具道數申提舉帳  
司其吏人各據所管生事文帳及案底簿書開拆收拔  
名件限三日判使紐計分數并具火勢先後申中書看  
詳收救并燒失若干量輕重賞罰如敢隱藏或故毀棄  
即令點檢申舉許人告犯人以違制論情理重者當刺  
配告人給賞錢三百十從之詔三司點檢編排帳目

文字具散失數及收救不足並申中書或樞密院下諸  
司檢錄降下中外奏聞事關三司未回報并諸處承受  
三司指揮勘會事未回申雖已回申未行下指揮當結  
絕者限五日申中書或樞密院元申牒三司文字即一  
面申牒三司以上並令本司置簿拘管敢有隱落以違  
制科罪其應見行事如未見條例並審議施行如事體  
稍大申中書或樞密院諸因三司火文案不全輒敢詐  
欺規圖官私財物及增減功過以違制論計贓重者以

枉法論

乙卯知制誥直學士院章惇權發遣三司使詔惇選舉判官不為例三司火惇時判軍器監遽領所部兵役往救上御樓問救火者誰左右以惇對上悅 詔將作監

檢計三司地基分布修蓋除副使判官不置堂外餘修如故買民居增廣地步所用材木令熙河採伐輸運委都轉運使熊本提點刑獄鄭民憲管勾 詔權三司使

翰林學士兼侍讀學士元絳落侍讀學士罷三司使鹽

鐵副使戶部郎中張問知虢州判官金部郎中李端卿  
太常博士祕閣校理韓忠彥為軍通判並降一官戶部  
副使太常少卿賈昌衡度支副使刑部郎中孫坦其餘  
判官檢法提舉帳勾院等十二人並罰銅三十斤制置  
永興秦鳳路交子司封郎中宋迪監三司門內侍殿頭  
李世良並奪兩官勒停初迪來稟事於三司而從者遺  
火於鹽鐵之廢廳遂燔三司故迪坐免絳等及責應救  
火官令御史臺劾罪以聞詔自今遇大燕親王宗室

使相樞密使副宣徽使三司使駙馬都尉並於殿門外  
幕次賜酒食舊制賜酒於集英殿後朶廊賜食於賜食  
廳權發遣宣徽院吳充奏其喧譁故改之

丙辰知制誥沈括兼判軍器監

代章  
惇也

知同州度支郎

趙瞻管勾陝西制置交子

瞻墓誌可考十八日宋廸  
制置二十六日云不可行

知潞州雄武軍留後郭達知太原府 清海軍節度推

官監邕州填乃金坑鄧闢為著作佐郎以歲課得金為

錢十萬緡故也後五年又得金為錢十五萬緡遷太常



博士於是廣南西路經略安撫司言此坑產金至多乞從本司舉使臣二人為監押巡檢兼監坑並先轉一資任滿課額不虧依橫山寨使臣例又增防守兵三百人從之募京西流民興修工役給錢糧老幼疾病計口給米置熙州天慶觀歲度道士二人給常住地三頃丁巳詔職方員外郎權發遣梓州路轉運副使李竦與監當差遣權知瀘州職方員外郎李曼勒停梓夔路兵馬鈐轄文思使張承祐供備庫副使孫仲達各追兩官

勒停坐瀘州夷賊擾邊不能捍禦也

六年四月六日四人同勘

已未詔自今差武臣知州軍並降勅 詔開封府界縣災傷及五分權停教閱保甲 界河巡檢都監供備庫副使郭寅降一官寅應詔舉習弓馬使臣右班殿直張亮亮自陳出於吏胥素不習弓馬故責之

辛酉上批諸路常平錢穀近年雖用陝西青苗法蕃息數不少然七分以上散在民間若遇水旱須救濟及緩急朝廷移用則卒難斂索今諸路各災傷來年歲計極

可慮若不速處置深恐州縣不計已倚閣過數接續不住給散致令闕乏宜速指揮諸路州縣據所管已支見在錢穀通數常留一半外方得給散其見有倚閣戶毋

更給

司馬光記聞蘇充云內侍李憲既怨介甫罷其南征乃言青苗錢為民害上以內批罷之介甫固執

不可而止先是州縣所斂青苗錢使者督之須散盡乃已官無餘蓄至是勅留五分此憲發之也青苗止散一半乃七年九月二十六日指揮與御集實錄同記聞所記或誤當是李憲怨介甫沮其往熙州故言此介甫時去位上因行憲言蘇充誤以為罷南征也南征乃介甫再入時事本志云上謂輔臣曰常平散錢收息賤價糴穀各用其半使二者如權衡之相依不得偏重則民受賜乃詔常平錢穀云云此下與實錄批語同但甚略耳

今附注此十七日上諭輔臣云云可考九年正月九日  
并二十二日及元豐元年閏正月七日可參考常留一  
半九年正月二十二日又申言此或  
司馬光所聞李憲發之實指此也  
詔置教閱武寧

成都府梓州路各兩指揮利州夔州路各三指揮時東  
兵之戍川峽者已多還營故也  
詔永興軍路支折二

錢二十萬緡付秦鳳等路轉運司市糧草及推行交子

本錢既而交子無實錢法不可行遂罷  
此墨本所書朱本因之九年正

月二十七日乃罷行交子今年六月二十六日又九月  
十八日并二十一日八年二月二十九日九年正月二  
十七日皆合參考  
食貨志云既以皮公弼熊本領交  
子事又以內藏錢一百萬緡假三司遣市易吏行四路

請買鹽引而三司又令秦鳳永興鹽鈔歲以百八十萬為額并趙瞻墓誌皆可考

壬戌賜皇第五子名偁 詔河北災傷州軍罷糴仍令

轉運司具見管及所賜錢糧有無闕少以聞先是秦鳳

路轉運司請於鳳翔府郿縣兼錫銅鑄折二錢都轉運使

蔡延慶言鳳翔府郿縣兼錫銅鑄折二錢皆脆惡以鑄

當五當十宜可用詔皆罷之 此據食貨志第六卷不得其時因本志附吳幾復皮

公弼等奏請前按實錄八月戊辰詔罷鳳翔府郿縣鑄夾錫青銅折二錢以錢成貫之輒碎也今并入此

谷罷鑄或前已見當存一去一 是時關中錢法敝永興軍路安撫使吳

中復請以錢四十買缺薄惡錢一斤則民間專行省撫  
大錢而大錢少不足用請以所買惡錢悉改鑄大錢而  
民間所行私大錢一以一小銅錢買而更鑄之永興軍  
等路轉運使皮公弼請盡買惡錢且毋行鑄鐵錢相易  
事有司舊納偽錢請先於本路五銅錢監改鑄一年可  
竟又請改鑄所買惡錢秦鳳路都轉運使熊本言買惡  
錢及禁舊通行大錢銅錢相易皆非便請降錢式下所  
屬而禁用惡錢犯者論如法勿廢盡舊通行錢選官庫

惡錢同所買改鑄之小變其撫為熙寧重寶今本路官錢受私錢已多省撫錢久廢公私百無一二今雖以錢四十得偽錢一斤及銅錢千易當二鐵錢千其實鐵錢一斤才當斤鐵耳千錢為鐵六斤斤鐵為錢二十而以銅錢千易之官失多矣又錢多一年改鑄未得竟也且民賣千錢得二百五十折二大錢才易其半又禁其通行大錢則方災傷民所有錢四亡其三何以救災衆議不同於是詔逐司相度利害以聞

此據食貨志第六卷此實錄所書頗詳當

用之十二月十一日甲戌  
熊本云云再下逐司相度

癸亥詔永興軍路安撫轉運提點刑獄提舉司具析奏  
流民盜賊不實因依以聞先是安撫等司言本路二麥  
薄收民闕食流移十已八九賊盜驚劫寢多下熊本體  
問本言無大驚劫故有是旨 權發遣兩浙轉運副使  
張靚言體量官司行鹽法差誤十事內三事盧秉舉覺  
已根究外越州有因監催鹽償錢母殺子者又瀕海等  
縣隔州縣追同保人令本路轉運司劾官吏其鹽事司



違法第月比較課利決責初錮專副詔淮南西路轉運司劾盧秉以聞其後奏至秉坐公罪杖六十用赦原之

差靚體量在五月十九日丙辰呂惠卿日錄熙寧八年八月二十八日進呈張靚乞避盧秉狀上曰是他乞移京東西一路或解罷赴闕莫只是要朝廷知僉曰是如此余曰但陛下察之便得見說盧秉尤怨臣等至於人前泣訴王珪曰韓絳等當時便要衝替却上曰秉誠有過當事余曰沈括初自浙中四面說底事必然面奏陛下斷過刑名一歲及數千人此是沈括錄來越州毋殺子是謝景溫手裏斷是括體訪來喚他張靚體量不得是虞太寧論盧秉事只明州有七八件違法雖是秉牒太寧賑庶然太寧才具中縣保甲東三日走到太寧縣搜尋他事便罷了太寧公事顯是怒他如此中明太寧言東立式與州縣應斷過鹽案並依式供中本司有

逐李申月中旬申逐時申或本司有勾當公事檢法官  
檢點至於入徒流配罪並不點檢已死及流配並追償  
錢於其家只六年八月一日內收坐官員已百餘員決  
人吏八百餘人如此盡有迹狀若送與秉分析必了不  
得然臣等為秉亦收許多課利而去歲中外方欲共壞  
朝廷新法則不可不且保全他以此只於靚體量事中  
只擇一件月比較專副事勘他然秉一路添許多刑名  
極非佳事又秉寬苛刻之罪嚴縱舍之禁則州縣自然  
趣向如此如張靚自言趁得課利多如秉未知實與不  
實若果是實却無如此違法事即為可嘉上曰若如此  
即須加賞八年七月九日盧秉自淮東提刑除發運副  
使靚時任兩浙運副故乞回避十月二十五日緣張若  
濟鄭膺事罷今附注惠卿云云於此七年九  
月二十八日更徐考之虞太寧事當并考  
詔中書

樞密院具陝西河北河東累年解發義勇推恩數  
數竟何如

詔三班院內外使臣如有能射親弓力八斗以上熟  
於使馬及輪弄器械者在班人許經本班乞試候及十  
人闕赴軍頭引見司考驗當引見在外使臣經本州軍  
委知州通判兵官同試驗如中格先以聞 是月置岷  
州宕昌寨 詔兩制以上有公事合同上殿者令同上  
殿